

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1907 del 25/06/2026

Von prachant sin auz pa herbestmånat 2026, vünf trèff pitt studjosan zo reda afte arbat bodaz hatt gelazzt dar psikoterapeut un intellektuel zimbar

Dar pensìaro von Elvio Fachinelli iz 'z pànt vor di trèff aft'z Lusérn

[Cimbro] “Omaggio a Elvio Fachinelli – Gedenkhan in Elvio Fachinelli (1928–1989)”: disar iz dar titl von konferentze vürgetrakk von Museo Lusérn, toal vodar djarliche auzlegom “Laüt vo Lusérn – Persone di Luserna”, zo gedenkha ummana von bichtegarsten figurn vodar psikanalisi vodar zboate toal von djardar Noünhundart. An okasion zo khenna in pensìaro von Fachinelli, a belesar psikiatra, psikoanalist, pedagogjist un politik attivista, gebortet atz Lusérn 'z djar 1928, darkhennante bia dar iz gest guat zo lega panàndar allz dazzel boda àgeat in mentsch, von sinn sin aftz lem vo alle tage.

Di trèff bartn soin inngehaltet in Kulturinstitut Lusern un mang soin gesek o in webinar. Disa iniziativa iz darkhennt azpe schuulkurs vor di lehrer vodar Provinz vo Tria un vor di studentn von kurs vo drai djar vo laurea in “Scienze e tecniche di psicologia cognitiva” un “Laurea magistrale in Psicologia” vodar Università vo Tria darkhennante darzua di krediti.

Dar earst trèff iz atz 27 von prachant 2026 di vünve in tages, pitt “La magia del disegno: quando le immagini curano”, a konferenz von profesor vo filosofia teoretika Gianluca Solla boda redet pin Giacomo Vergot vodar STAP – Società Trentina Altoatesina vo Psikoanalisi. Durch in trèff bartma ren von studje von Fachinelli aftn kaso vodar “paziente Laura”, zo vorstiana bia dar disenjo mage soin an mòdo zo khennase sèlbart un zo magase pèzzarn.

Atz viare von ludjo 2026 di 17.00 barta soin “L’importante è che se ne parli? Fachinelli e il futuro della salute mentale”, pitt Gioele Cima – lehrer von “Istituto di Ricerca di Psicoanalisi Applicata” - boda redet pinn Lorenzo Curti (STAP). Dar trèff bill zoang bia ma nützt in ta' vo haüt, kartza vil börtar vodar psikolodja baldada nèt iz mengl, un atz baz 'z hatta khött aft ditza Fachinelli, boda hatt sa gehatt darkhennt ke 'z berat vürkhent.

Atz 11 von ludjo, hèrta di 17.00, dar trèff iz “Il desiderio dissidente in Elvio Fachinelli”, konferenz vo Pietro Barbetta, diretor klinik un bizzaschafteg vodar International School of Systemic Therapy in Transcultural Contexts, boda redet pitt Marisa Guglielmi (STAP). Di konferenz bart ren von pensìaro Fachinelli boda haltet azta di umsinnen iz frai un geat nà in zaitn.

Atz vünve von herbestmånat, dar trèff “Elvio Fachinelli e l’asilo autogestito di Porta Ticinese a Milano” bart soin vürgetrakk vodar psikoterapeuta un psikoanalista Erica Ferrario, pitt Mauro Milanaccio (STAP). Dar trèff bart ren von asilo augelekk a Milàn boda hatt geböllt lirn in khindar zo maga vorstian sèlbart bia un baz zo tüana daz péste vor sé.

Dar lest trèff bart soin atz 12 von herbestmånat 2026, pitt: “Fachinelli: fidarsi dell’inconscio”, konferenz von filosofo un schraibar Sergio Benvenuto pittar Veronica Cattani (STAP). Dar trèff redet atz bia 'z stèlltze inn dar pensìaro von Fachinelli afte umsinnen azpe kraft, in di psikanalitische studje vo soinar zait.

Di trèff so in gepuntet fra sé umme in pensàro von Elvio Fachienelli: er iz gest a bichtegar psikoanalist vor 'z Beleschlânt un soi pensàro iz no bichte haüt zo vorstiana bia 'z bèkslnda di laüt, di kultur un di bèlt.

Zo bizzasan mearar un innzoschraibase online makma gian aftn sito www.lusern.it odor årüavan in Kulturinstitut aftn info@lusern.it odor aftn nummar 0464789645.

Übarsetzt von Kamou vo Lusérn

(eng)